

**Avanersuarmi inuussutissarsiutinik inerisaanissamut siunertalimmik periusissiorinissamut, ilaatigut qaammarsaassutinik pikkorissaanernillu imaqartussamik UKA2026-mut suliaqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Lars Poulsen, Siumut)

### **Akissuteqaat**

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

### **Siullermeerineq**

Aallarnisaaneq Naalakkersuisunit pingaartinneqarlunilu sallinneqarpoq – Avanersuarmi, nunattalu sinnerani.

Inuussutissarsiutinik ineriartortitsineq inuiaqatigiinnitsinnut pingaaruteqarlunnaarpoq. Suliffeqarfinnik pilersitsisarpoq, najukkani inuiaqatigiinnut nukittorsaataasarpoq, patajaannerusumillu aamma imminut napatissinnaaneruseqanngitsoq aningaasaqarnissamut tapertaalluni. Tamanna pillugu aallarnisaaneq aamma suliffeqarfinnik nutaanik ineriartortitsineq, inuussutissarsiutit pillugit ataatsimut politikkimi pingaarutilimmik pingaarnersiorneqarlutik. Tamannarpiat patsisigalugu inuussutissarsiutinik ineriartortitsineq, aallarnisaanerlu siuarsarniarlugit nuna tamakkerlugu periusissiasamik suliaqarneq Naalakkersuisut aallarteerneqarpoq. Suliniutit Naalakkersuisut sulissutigisaat arlaqartut siunnersuuteqartup taakkartorpai, suliniutillu taakkua inuussutissarsiutinik siuarsaaneq pillugu nuna tamakkerlugu periusissiasap suliarineqarnerani ilaareerlutik.

Periusissiasaq nunamut tamarmut atuunnissaa Naalakkersuisut pingaartissimavaat. Isumalluutit pitsaanerpaamik atorineqarnissaat, sunniivigeqatigiissinnaasullu tamakkiisumik atorluarneqarnissaat tassuunatigut qulakkeerneqassaaq – soorlu assersuutigalugu nunap ilaani suliniuteqarnermi, nunap ilaani misilittakkat iluaqutigineqarsinnaatillugit imaluunniit akimortumik suleqatigiinneq ineriartortissinnaatillugu.

Suliffeqarfinnilli nutaanik ineriartortitsissagaanni, suliffeqarfioersunillu nukittorsaassagaanni sulisoqartariaqarpoq. Ilisimaneqartutullu suliffeqarnermi aqqissuussaannikkut, matumani inuusuttut akornanni qaffasissumik suliffissaaleqineq ilanngullugu, unamminartoqaalulluni.. Sulisoqarneq nukittorsarniarlugu innuttaasut nunap immikkoortuini, inuunerminnilu killiffii qanillugit siunnerfeqarnerusumik suliniuteqartariaqarpoq. Inuusuttut inuttut ajornartorsiuteqarlutik suliffissaaleqisut imaannaanngitsumik inissisimakkajuttarput, tassanilu suliffissaaleqineq suliffissaqannginnermik patsiseqaannarani aamma inuttut, ilaqutariittut, inuiaqatigiinnillu akimmiffinnik patsiseqartarluni. Inuusuttorpaaluit naleqartutut misigisimannngillat,

tarnikkut unamminartitaqarput, atornerluisuupput imaluunniit attaveqarfeqaratilluunniit – pissutsit ilinniagaqalernissamut, suliffeqalernissamut aallarnisaanissamulluunniit alloriarnissamut ajornakusoortitsisut. Taamaattumik taakkununga paasisitsiniaaneq, tapersersuinerlu paasissutissanik pissarsiffiusinnaaginnarani isumaginninnermi suliniutit, suliffeqalernissarlu siunnerfigalugu neqeroorutit ingiaqatigiissillugit tamat isiginnissusilimmik aallaaveqarnissaa aalajangiisuvoq,.

Najukkami pisariaqartitat, isumalluutillu aallaavigalugit inuussutissarsiutitigut, suliffeqarnikkullu suliniutit suliarineqarlutillu atulersinneqassasut, nunalu tamakkerlugu suliniutit najukkami naleqqussarneqarsinnaasunik sinaakktissiissasut Naalakkersuisut kissaatigaat.

Naalakkersuisut nalilerpaat, suliniutinik nutaanik aallartitsinani inuussutissarsiutinik siuarsaaneq pillugu nuna tamakkerlugu periusissiassap naammassineqarnissaa, atuutsilersinneqarnissaalu pingaarnersiorneqaruni naleqqunnerpaassasoq. Tamanna tunuliaqutaralugu inassutigineqarpoq, siunnersuut itigartitsissutigineqassasoq.

Periusissiassap naammassineqarnissaanik, atuutsilersinneqarnissaanillu suliaqarnermi kommunit, inuussutissarsiutillit, Inatsisartullu oqaloqatiginerisa nanginnissaannut Naalakkersuisut qilanaarput.

Taamatut oqaaseqaateqarlutik Inatsisartut oqallinnissaat Naalakkersuisut qilanaaraat.